

Gadkari Ramban Bypass

مرکزی وزیر نتن گڈکری نے 2 عشاریہ 35 کلو میٹر لمی بانہال قصبہ نانہہ بائی پاس کرن آلی چار پالی سڑک غی کامیابی سنگ تکمیل غو اعلان کیو ہے، جس ور 2 ارب 24 کروڑ 44 لکھ روپیاں غی رقم خرچ آئی ہے۔ قومی شاہراہ نمبر 44 غا رام پن بانہال حصہ ور بنائی گئی اس بائی پاس سڑک ور 1 کلو میٹر تے 5 سو 13 میٹر ور محیط 4 پل تے 3 چھوٹی پلین تعمیر کی گئی ہیں۔ اس بائی پاس سڑک غی تعمیر سنگ بانہال قصبہ مانہہ گڈیاں غا جام تیں بچیو جاسکے گو۔ اک سماجی میڈیا پوسٹ ور مرکزی وزیر غو کہنو ہے جے وزیر اعظم نریندر مودی غی پُر بصیرت رہنمائی مانہہ مکمل کیا گیا اس پروجیکٹ سنگ جموں غا اقتصادی درجہ مانہہ مزید بہتری آویگی۔ دسیو گیو ہے جے شروع مانہہ 2 پالی ٹریفک اس سڑک ور چلائی جائے گی۔ جد کہ جنکشن بنایا جان غے بعد آئندہ 15 دناں غے اندر اندر چار پالی ٹریفک اس بائی پاس سڑک ور بحال کر دتی جائے گی۔

Railway Inspection

جموں کشمیر مانہہ اُدھم پور سرینگر با رہمولہ ریلوے لائن پروجیکٹ غا آخری معائنہ تیں پہلا کل کٹڑہ بانہال ریلوے لائن حصہ غو کامیابی سنگ آزما نشی معائنو کیو گیو۔ اس حصہ ور چلائی جان آلی آزما نشی ریل گڈی مانہہ اُدھم پور سرینگر با رہمولہ ریل لائن تے شمالی ریلویز غا دوجا افسران غے ہمراہ اعلیٰ انتظامی افسر سنڈیپ گپتا وی موجود تھا۔ ریلوے تحفظ غا کمشنر سی آر ایس آئندہ 7 تے 8 جنوری نانہہ ریلویز غا اس حصہ غو آزما نشی ریل گڈی چلایا جان غو معائنو کریں گا۔ جس غے بعد وے اس سلسلہ مانہہ اک رپورٹ پیش کریں گا۔ اس رپورٹ غے مطابق وادی کشمیر نانہہ ریلوے خدمات مہیا کران بارے آئندہ غی حکمت عملی طے کی جائے گی۔ اسے دوران ریلوے وزارت غی طرفوں شمالی ریلوے زون غے تحت اک نوی ریلوے ڈویژن قائم کی جائے گی۔ جس غو صدر دفتر جموں مانہہ وے گو۔ یاہ نوی ڈویژن فیروز پور ڈویژن غی تنظیم نو غے تحت قائم کی جائے گی۔ آکاش وانی جموں غا مہارا نمائندہ نے جانکا ری دیتاں وان دسیو ہے جے اس نوی جموں ریلوے ڈویژن قائم کیا جان بارے وزیر اعظم نریندر مودی پلک یعنی 6 جنوری نانہہ ویڈیو کانفرنسنگ غے ذریعے اعلان کریں گا۔

CS Khelo India Winter Games

چیف سیکریٹری آتل ڈلو نے کل زور دیتاں وان کہیو ہے جے ”کھیلو انڈیا وینٹر گیمز“ جیسی جھیڈاں نانہہ جموں کشمیر مانہہ سیاحت غا فروغ غی خاطر بابدو دین غی لوڑ ہے، چیف سیکریٹری آئندہ 22 فروری تیں 25 فروری توڑی گلبرگ مانہہ ”کھیلو انڈیا وینٹر گیمز“ غا پنجواں ٹورنامنٹ غی تیاریاں غو جائزو لے رہیا تھا۔ الپائن سکینگ، سنو بو رڈینگ تے سردیاں گا موسم غی دوجی کھیڈاں مانہہ شرکت غی خاطر ملک پھر تیں کوئے 1 ہزار تیں متا کھڈاری حصو لے رہیا ہیں۔ اس سلسلہ مانہہ تیاریں جاری ہیں، تانجے سردیاں غی کھیڈاں غا اس ٹورنامنٹ نانہہ کھڈاریاں تے تما شایاں واسطے یا دگار بنایو جاسکے۔ چیف سیکریٹری نے اس موقع ور متعلقہ محکمان نانہہ ہدایت کی ہے جے وے حفاظت ٹرانسپورٹ، صحت تے دوجی بنیادی سہولتاں غی اس موقع ور دستیابی غی خاطر بہتر تال میل رکھیو جائے۔

Exam Postponed

کشمیر یونیورسٹی غی اطلاع غے مطابق یونیورسٹی غی طرفوں پلک یعنی سوموار تیں لیا جان آلا امتحانات ملتوی کر دتا گیا ہیں۔ کشمیر یونیورسٹی غی طرفوں جاری کی گئی اک نوٹیفکیشن غے مطابق یہ امتحانات گورو گو بند سنگھ جی غی یوم ولادت ور کی جان آلی سرکا ری چھٹی غی وجہ نال ملتوی کیا گیا ہیں۔ ملتوی کیا گیا ان امتحانات غی اگلی تاریخ بارے علیحدہ تیں نوٹیفکیشن جاری کی جائے گی۔

Army Animal Husbandry

گرائیں ترقی غا سلسلہ مانہہ کیا گیا اک یادگار اقدام غا طور ور محکمہ مویشی پالن غا تعاون سنگ بھارتی فوج نے راجوری ضلع غا بٹھان بدھل غا مقام ور اک ویٹنری تے میڈیکل کیمپ غو انعقاد کیو۔ اس کیمپ غے دوران مویشیاں غو مفت معائینو کیا جان غے نال نال مفت دوائیں تقسیم کی گئیں، نالے کساناں نانہہ مویشیاں غی بیماریاں تے اُن غی روک تھام اور اعلاج بارے جانکاری دتی گئی۔ اس کیمپ تیں بڑی تعداد مانہہ مقامی کساناں نے فائدو چایو، تانجے مویشیاں غی صحت غو خیال رکھتاں واں علاقہ مانہہ ذراعت غا شعبہ سنگ منسلک سرگرمیاں مانہہ تعاون دتو جا سکے۔

Drug Control Ramban

منشیات کنٹرول محکمہ غی خاطر منشیات کنٹرول بارے تمام تر حفاظتی بندوبست ور کاربندین غا سلسلہ مانہہ نمایاں اقدام کیا ہیں۔ مہارام بن غا نمائندہ نے جانکاری دیتاں واں دسیو ہے جے اس کاروائی غو اثر ہووے جے دوائی فروشاں نے اپنی دکاناں ورسی سی ٹی وی کیمرانصب کیا ہیں، تے تمام تحفظات نانہہ اپنان ور عمل کیو ہے۔

Weather

محکمہ موسمیات نے پیشنگوئی کی ہے جے پلک سویرے توڑی جموں کشمیر مانہہ سردی غی شدید لہر مسلسل جاری رہے گی۔ جموں کشمیر غا کسے حصہ تیں وی بارش یاہ برفباری غی کوئے اطلاع نہیں ہے۔ البتہ سرینگر سمیت یوٹی غا گجھ حصاں مانہہ آئندہ درمیانہ درجہ غی برفباری جد کہ جموں گا میدانی علاقاں مانہہ بارش غو امکان ہے۔ اس غے بعد پیشی 6 جنوری تیں 10 جنوری توڑی موسم خشک رہن غی امید ہے۔ اس غے بعد 11 تے 12 جنوری نانہہ ہلکی برفباری غو امکان ظاہر کیو گیو ہے، جد کہ 13 جنوری نانہہ فر موسم خشک رہن غی توقع ظاہر کی گئی ہے۔
